

JEDAN GRAD, JEDNA BORBA

Piše ko zna, smije i umije; izlazi kad treba i mora; štampa se u kućnoj radinosti.

PRIVATIZACIJA ŠAPTOM SE NASTAVLJA

Nakon što su lansirale kampanju prvog ešalona navodnih eksperata za javno-privatno partnerstvo kao jedino rješenje za popljačkana gradska komunalna preduzeća, vlasti u Sarajevskom kantonu otvaraju novi kolosijek prikrivene privatizacije – koncesije.

Javno-privatno partnerstvo u komunalnom sektoru bi omogućilo privatnicima da ostvaruju profit kroz svima neophodan javni servis i gdje je poslovni rizik nula. Kako? Tako da npr. privatnik kupi svu zaradu s ključnih linija gradskog prevoza (Dobrinja-Vijećnica), a država se obaveže da mu pokrije gubitke na linijama za udaljenija i manja naselja. Država i dalje plaća, a zarađuje nula. Privatnik ostvaruje čistu dobit.

Drugi način presipanja javnog dobra u privatne ruke, a da se privatnik baš ne mora previše istrošiti odjednom, jesu koncesije. **Koncesijom se od države kupuje pravo da se iskorištava, npr. neki prirodni resurs ili društveno dobro i sl. Ni slučajno bezazlena stvar.** Privatna eksploatacija može dovesti do iscrpljivanja resursa i dobara ali je opasna i onda kada osnovne resurse, od kojih zavisi cijelo društvo, distribuira krajnjim korisnicima isključivo prema tržišnom principu isplativosti a ne prema potrebama. Privatna eksploatacija takođe može srozati kvalitet usluga koje su od vitalnog značaja za opstanak društva – u zdravstvu npr. ili prevozu.

Zato mnoge države ustavom štite neka dobra od mogućnosti bilo kakve privatne eksploatacije.

No naše vlasti široke su ruke. Tako su odobrili i silne koncesije na našu vodu iako ne znaju da li je uopšte imamo dovoljno za potrebe stanovništva. Štaviše, njihova velikodušnost s društvenim dobrima ne poznaje granice – oni za mnoge koncesije ne prave nikakve ugovore a i kad naprave, ne utjeruju dugove, pa ni bogatog Coca-Coli koja ne plaća našu vodu koju crpi!

Takva “podrška razvoju privatnog sektora” međutim traži fleksibilniji zakonski okvir. Prijedlog zakona o koncesijama ide u ruke poslanika naše kantonalne skupštine već 22. marta.

Po tom zakonu – sve se može dati pod koncesiju: bilo kakvo prirodno bogatstvo, bilo kakvo društveno dobro, bilo kakve usluge, infrastruktura – sve pobrojano u zakonu, a da ne bi šta promaklo ili izmaklo, u tekstu se na kraju veli: “druga opća i javna dobra, sadržaji i usluge pogodni za dodjelu koncesije i koji spadaju u nadležnost Kantona, a koji nisu određeni ovim zakonom.” Jednom riječju – SVE.

Zakon ide na usvajanje po skraćenom postupku – nema javne rasprave. Ako se usvoji jednog dana npr. Hitna pomoć može završiti u rukama privatnika, za neku siću. Ili Vijećnica. Ili žičara. Ili tramvaj. Mjesna zajednica? Ili možda baš Opća bolnica, stari žal SDA.

A kad naše zajedničko dobro, poput vode ili zdravstvene ustanove, od kojeg zavisi opstanak cijelog društva, završi u rukama kakve lokalne ili međunarodne kompanije, jedini interes koji će se poštovati biće interes tog privatnika a to je – što veća zarada.

LJUDI KONTRA BETONA!

MZ Marijin-Dvor – Crni vrh ustaje protiv uništavanja grada radi profita građevinskih klanova

Od prošle sedmice na Marijin-Dvoru radi tim koji ima zadatak da se izbori za učešće građana u planiranju izgradnje na području između tramvajske pruge i Vrbanje, te širem području Marijin-Dvora, i to po mjeri potreba stanovništva!

Za ovo područje vlasti planiraju ubrzano donošenje novog regulacionog vplana. U izradi plana, kako garantuju federalni zakoni, mora aktivno učestvovati cijela zajednica, putem javnih rasprava, okruglih stolova, tribina, itd. Kantonalne,

gradske i opštinske vlasti međutim ove uredbe aktivno nastoje zaobići i što prije krenuti u izgradnju, po mjeri interesa i prohtjeva privatnih građevinskih lobija.

Tim čine predstavnici građana, mjesne zajednice i političke organizacije “Jedan grad, jedna borba”.

**Ako želite učestvovati, bez obzira iz kojeg ste dijela grada, javite se: jedangrad.jednaborba@gmail.com
Jer: jedan grad = jedna borba!**

300 MILIONA NAŠ KANTON IMA!

Ili nastavak predsjedničkog Trotoara drugim sredstvima

Vlada Kantona Sarajevo gradi novu transverzalu od Željezničke stanice do Vogošće. kako tvrde, radi smanjenja saobraćajnih gužvi.

Cijena: 300 miliona KM za 9 kilometara ceste!

Milione će Vlada spremno namaći iz budžeta (naše pare) i kredita (vraćaju se našim parama).

A šta se moglo za iste pare?

(umjesto komada asfalta kojeg će narednih pet izbornih ciklusa svečano otvarati?)

Pokrenuti lokalne vozove => rješenje saobraćajne gužve, u grad stiže manje vozila i manje zagađenja, znatno manje košta i k tome zapošljava željezničare.

Sanirati tramvajsku prugu i kupiti nove tramvaje => manje auta, manje gužve i zagađenja, zarada za gradski prevoz.

Popraviti dobar komad Vodovoda => imamo vode i ne mislimo šta izlazi iz česme.

Ulagati u obrazovanje - i ne zatvarati škole da bi se poslije preprodavale kao nekretnine!

UŠTEDE U JAVNOM ZDRAVSTVU Pojeftinjenje života za bogaćenje privatnika

Već nekoliko mjeseci SDA agresivno vodi promotivnu kampanju podrške finansijskim rezovima u zdravstvu. Zbog drastične štednje na Kliničkom centru svakodnevno se rizikuju naši životi,.
Iz Uprave KCUS-a se pak uporno ponavlja kako se njihov dug rapidno smanjuje, a novinari – ko iz neznanja, ko iz interesa – ne preispituju ništa od iznesenih tvrdnji.

Od tako glasne kampanje ne čuje se o:

! Svim listama čekanja

koje su sve kraće samo zato što očajni ljudi zadnje pare daju privatnim ordinacijama za usluge koje im duguje javno zdravstvo.

! Svim plaćanjima lijekova i materijala

koje bismo morali besplatno dobiti u bolnici

! Svim aparatima

koji ne rade u državnim ustanovama ali rade u privatnim ordinacijama.

! Svim profilima doktora

koje nemamo niti ćemo imati jer se sistematski specijalizacije daju na kašičicu a mladi ljekari tjeraju u inostranstvo.

U pozadini cijele priče nije horoskop za 2017. dr Sebije Izetbegović niti nekakvi personalni animoziteti – tako se samo usmjerava pažnja javnosti na nebitno.

U pozadini je plan da se namakne posao (i zarada) privatnicima u zdravstvu, nauštrb javnog zdravstva.

Plan je da se već iscrpljeno javno zdravstvo gurne u utakmicu s privatnicima za sredstva iz javnog Zavoda za zdravstvo. To će biti rezultat mnogo reklamirane reforme u Kantonu Sarajevo. Uništeno javno zdravstvo gubiće tu utakmicu. Kada to dovede do kolapsa javnih ustanova, kao što se to desilo drugdje u regionu i svijetu, privatnici će diktirati cijene usluga.

A onda će zdravlje zavisiti malo od sreće i genetike, no ponajviše od para.